



Peter e sia consorta Hedy Derungs han gestiunau durant 30 onns il menaschi dalla pendiculara da Riein a Signina.

FOTO RTR

Buca tuts san duvrar la cabina da Signina

La pendiculara da Riein a Signina ei buca publica per in e scadina. La lubientscha da menaschi cantunala digl onn 2017 san actualmeins mo habitontas e habitonts da Signina e lur visetas e persunas che han funs d'agricultura a Signina far diever dalla cabina. Pil diever public stuess la pendiculara vegnir renovada.

MARTIN GABRIEL / FMR


«La pendiculara cun ina distanza da 750 meters da Riein vi Signina ei vegnida construida ils onns suenter 1970 enstagl d'ina via da meglieraziun denter Riein e Signina», di il president communal da Ilanz/Glion *Marcus Beer* alla damonda dalla FMR daco ch'ei detti argnamein negina via da colligaziun che meini da Riein a Signina. «El rom dalla meglieraziun funsila da Riein han ins construiu la pendiculara sco compensaziun per ina via da meglieraziun. Perquei ha il cantun Grischun finanziau da lezzas uras ina gronda part da quella pendiculara.»

Negins tranports da turists

Il diever dalla pendiculara da Riein a Signina ei reglaus. «Ella lubientscha da menaschi ch'il cantun Grischun ha renovau igl onn 2017 eis ei determinau claramain tgi che astga far diever da quella pendiculara», di il president communal da Ilanz/Glion. Quei seigien ils habitonts da Signina e lur visetas, ils proprietaris da casas e baghetgs da vacanza a Signina, ils purs che cultiveschian suloms a Signina e las persunas dil menaschi forestal. La lubientscha hagen era persunas responsablas pil manteniment dall'infrastructura egl uclau al pei dil Pèz Fess. E secapescha che la pendiculara – che dispona d'ina barella – seigi era accessibla pil transport da biestga e da material. Sclausa dalla concessiun ein tenor Marcus Beer denton intents commercials, pia per exempel era transports da turistas e turists.

Negin mied da transport public

Entochen avon entgins onns era il menaschi dalla pendiculara da Riein-Pardi a Signina survegliaus da *Peter e Hedy Derungs* da Signina. Entochen ch'els ein stai responsabls per la pendiculara, astgavan era turistas e turists far diever da la pendiculara cun telefonar als survegladers e dumandar per la lubientscha d'ir culla cabina sur la val vi. La famiglia Derungs ha denton dau giu las clavs suenter 30 onns per motivs da vegliadegna. Ed els ein oz ils davos dus habitonts stabels da Signina. Con gittg che Hedy e Peter Derungs habiteschan aunc leu,



La pendiculara da Riein a Signina (silla fotografia davosvart) astga transportar vischins da Signina e lur visetas sco era possessurs da suloms d'agricultura.

FOTO AUGUSTIN BEEL

han els buca saviu dir enviers la FMR. Suenters el ha denton negin supriu la gestiun dalla pendiculara pli.

Investiziuns indispensablas

«Per in diever ordeifer las categorias da persunas stipuladas ella lubientscha da menaschi, stuess ins exnum haver ina persuna da gestiun ed ins stuess far lavurs da renovaziun vid la pendiculara», declara *Thomas Tanner*, il menader dil survetsch da pendicularas egl Uffici d'agricultura e da geoinformaziun dil Grischun. «La pendiculara da Signina correspunda buca pli al level tecnic e da menaschi ch'ei duvrass pil diever public.» *Thomas Tanner* di che quellas persunas che drovien oz la pendiculara ed hagen in clav seigien instruidas co secutener e co far diever dalla cabina.

Dependents dalla cabina

Dapi prest 50 onns ein ils da Signina dependents dalla cabina per contonscher lur suloms. Signina ei situau sin ina terrassa frigeivla ella Cadeina dil Grischun. Il bi funs, uals e pastiras

ein denton cunfinai da tuttas varts: Encunter sidost ei la Cadeina dil Signina, encunter sid la Val da Cabiena, el vest e nord la profunda Val da Riein.

A caschun dalla davosa sesida dil parlament communal digl onn 2023 ha la suprastanza communal communicau ch'ins seigi vidlunder d'examinar variantes per sanar la pendiculara.

Andreas Pfister, il menader dall'infrastructura e planisaziun dalla vischnaunca Ilanz/Glion ha confirmau quest jamna enviers la FMR ch'ins hagi buca fatg ina revisiun dalla pendiculara igl onn vargau. Ei seigi denton vegniu fatg controllas e reparaturas pli pintgas dil pilotadi. Il parlamentari da Riein, *Thomas Zinsli*, ha deg enviers la FMR ch'el appartegni ad ina cumissiun che hagi da s'occupar cugl avegnir dalla pendiculara da Riein-Signina. Mo el hagi udiu nuot e sappi buca co che quei mondi vinavon. Cun auters plaids vul quei dir che la pendiculara da Riein a Signina sa vegnir duvrada era egl avegnir mo da persunas ch'ei instruidas, han ina lubientscha ed ina clav per ir culla cabina.

LAAX

Podi davart gl'avegnir dalla cardientscha

La pleiv catolica da Laax festivescha uonn siu giubileum da 500 onns dapi la fundaziun. Suenters la festivitat principala dils 17 d'ost 2025 suonda ina discussiun al podi. Quel ha il tetel «Surselva, tiara dalla missiun – ha la cardientscha cristiana aunc in avegnir cheu tier nus?». Sco quei che la pleiv da Laax scriva en sia communicaziun, duei l'occurrenza buca dar accent al svilup ed alla historia dalla pleiv, mobein agl avegnir. «Pretensiuna vegn el futur era ad esser la sfida da mantener ils fundaments da nosa cardientscha e las tradiziuns dalla baselgia», aschia la pleiv da Laax. Il contuorn sociologic e demographic seigi apparentamein suttemess a midadas permanentas.

La tendenza actuala ellas baselgias ei evidenta: durant ils survetschs divins e d'autras fuormas da liturgia ein las baselgias savens vitas. La pratica religiosa visibla ei vidlunder da svanir ord la veta publica dalla Surselva. Era la ductrina e gl'entruidament ella cardientscha seigi per affons ed instruiders ed instruiders savens plitost in stuer. «Nus vulein prender la caschun da nies giubileum da 500 onns da ponderar e reflectar surlunder», scriva la pleiv catolic-romana da Laax. Il podi da discussiun da vendergis, ils 21 da november 2025, vegn a sededicar allas damondas digl avegnir religios. Il podi detti caschun d'endriescher ils parers da differentas persunalitads responsablas. Al podi separticipeschian denter auter gl'uestg diocesan *Joseph Maria Bonnemain* e la sora dominicana *Monica Hüppi* dalla claustra da Glion. Plinavon vegn *Marion Hilber*, la responsabla per l'instrucziun da religiuin dalla Baselia catolica dil Grischun, ed il teolog *Claude Bachmann* a plidar e manifestar lur meini en caussa. (cdm/fmr)

La discussiun e podi a Laax ei venderdis, ils 21 da november 2025, allas 19.00, ell'aula dalla casa da scola a Laax.

GLION



Igl Areal Maissen el center dil marcau da Glion ei il tema dalla Fucina da cultura dils 8 da november 2025.

FOTO AUGUSTIN BEEL

Areal Maissen – co vinavon?

La cumissiun da cultura da Ilanz/Glion envida alla Fucina da cultura che sefatschenta uonn culla damonda dil futur digl Areal Maissen denter il Glogn e la staziun da viafier a Glion. Igl Areal Maissen cun 6000 meters quadrats ei vegniu acquistau il fevver 2025 dalla vischnaunca Ilanz/Glion. Ensemien referents e referents duei igl Areal Maissen sco spazi da viver vegnir discutaus durant l'occurrenza che ha liug la sonda, ils 8 da november 2025 naven dallas 14.00-20.00 a Glion el Cinema Sil Plaz. Il suenter-miezdi datti quater referats cuorts dils dus architectes *Christian Interbitzin* e *Marc Löliger*, da *Gian Fanzzan* e da *Ursula Müller* digl Uffici da construcziun aulta da Turig. Allas 17.30 ha liug ina discussiun al podi. L'occurrenza cun apéro riche ei gratuita. Annunziats ein da far entochen ils 5 da november all'adressa da mail: kultur@ilanz-glion.ch (cdm/fmr)

ILANZ/GLION

Bostgers e catschadurs han plantau 50 viezs

Tenor il motto «fai dil bien e plaida surlunder» han bostgers e catschadurs d'Ilanz Glion plantau 50 viezs la sonda vargada egl uaul da protecciun. L'acziun ei vegnida organisada dalla Selva – l'associaziun dils possessurs d'uaul dil Grischun – e dall'Union dils catschadurs da patenta dil Grischun. Sco quei che la Selva scriva en ina communicaziun als mieds da massa, ei l'acziun ina contribuziun activa alla regiuvinaziun digl uaul en connex culla midada dil clima. Medemamein duei l'acziun promover il dialog denter ils possessurs d'uaul, ils bostgers ed ils catschadurs. Tut en tut duei vegnir mess comunablamain 10000 plantinas egl uaul grischun. Sco la Selva punctuescha ella communicaziun allas medias ei igl uaul in impurtant spazi da viver che porscha protecciun, furnescha lenn e conserva CO₂. (cdm/fmr)



50 viezs ein vegni plantai la sonda vargada egl uaul da protecciun dalla vischnaunca d'Ilanz/Glion. FOTO MARKUS CASUTTI PHOTOGRAPHY